

煙

嶼

樓

文

集

柳泉先生像



甬上儒碩樓王萬全先生崛起踵
武前賢吐辭成章宏深四達英絕
領袖名振海國拳，斯文求是折
中皐比兀坐以是始終瞻拜遺像
典型儼在歸乎一老來哲模楷

門人劉鳳章謹題

鄞縣志傳

徐時棟字定宇一字同叔學者稱柳泉先生少孤力學
穎悟倍常道光二十三年充優貢學使羅文俊命呈所
作詩古文歎爲異才旋中二十六年舉人兩上春官卽
不復試以輸餽授內閣中書故居曰烟嶼樓藏書六萬
卷盡發而讀之自夜徹曉丹黃不去手覃思精詣直造
古人其論經最取先秦之說以經解經旁及諸子引爲
疏證無漢宋門戶之習攷辨鑿鑿可息聚訟其論史獨
推史遷班范以下則條舉而糾之多前人所未發畱心
文獻刻四明宋元六志考異訂訛允稱善本爲宋儒袁

變請從祀創一郡未有之事實冊出其手大學士倭
仁見而韙之議上果得

俞旨他所撰著凡三十餘種兩遭兵火散佚殆盡構新
宅城西摒擋之暇時復憶錄然不能什四五矣文章宏
深博偉入韓柳之奧詩亦沾落自喜後進高材咸出其
門四方知名之士以事來鄞者類以所學相質問各得
其意而去主四明壇坫三十餘年時棟內行敦篤待朋
友有恩紀力所不及稱貸以益之父桂林嘗建小學繕
浮橋有德於鄉時棟偕其弟時樑繼之事益修舉佐巡
道段光清修洪水塘俾西南鄉無旱乾患建議爲縣中

貞烈節孝諸婦女請旌多至千餘人監司守令重其名
登門造訪一切謝之以名刺答拜而已同治七年開鄞
志局延時棟主其事發凡起例總持大綱編輯討論則
屬諸同事任之次年移局其家益發藏書及借閱同里
盧氏杭州丁氏書搜採繁富至千數百種仿

國史館列傳之例注所徵引排比成文以是費日力十
二年時棟已屬疾猶強起論志事臨歿執其友董沛手
鄭重相委語不及私十一月卒年六十

序

吾友徐君柳泉博覽羣書自其少時卽抗心希古思登作者之堂視世俗科舉之學夷然有所不屑然試輒高等風檐急就詩賦時藝及柳汀社課諸作一時爭相傳誦而不知特其緒餘也道光癸卯以優行貢成均丙午中本省鄉試兩赴禮闈以輪餉授職內翰決然舍去家居著書不輟其學以治經爲宗而不墨守舊解其他子史雜說及枌榆掌故皆有論撰尤以詩古文名於時竊嘗觀其作文慘淡經營不肯苟下一字脫藁讀之一種雄直之氣浩浩落落不可掩抑未嘗剽竊字句以爲古

未嘗規仿格調以爲高蓋其天才亮特學識兼優明達
事理而長於議論卓然自成一家吾鄉先正宋元如樓
宣獻袁文清

國朝如姜西溟全謝山諸先生後未易一二數也余辱
文字交四十年每有所作必出以見示別久輒手錄近
藁寄余評論偶爾獻疑初不以爲然反覆辨難或至再
三他日相見則曰吾子之言是也復出示其改定者相
視一笑及兩遭鬱攸摒擋殘帙余多檢前藁歸之復徧
訪友朋所傳鈔及劫後追憶所得手自刪定得文四十
卷然其亡失者多矣曩刊煙嶼樓詩集索余弁言余勉

題四律謂當俟文集告成并序之同治癸酉君遽歸道
山遺命其甥葛豫齋以定本付梓豫齋力肩其任而門
下劉藝蘭嗣子平甫相與校訂之厥工既竣平甫請序
於余自慚才不相及無能闡發君之所學然知己之感
耿耿於懷墓草久宿言猶在耳用書此以踐前諾

光緒三年九月世愚弟陳勸序

序

自隋唐廢選舉而著述與科目劃然成兩途顧科目者千百著述者不過一二此一二之中著述與科目並顯者又不過什之一不得志科目而從事著述者幾什之九然則著述者科目之窮求其中心好之終始著述雖科目方利而屏棄弗顧若我舅氏徐柳泉先生實罕覩焉先生稟絕人之資生而嗜古幼習舉業便爲餘事其登賢書年甫逾立假令銳於仕進希志通顯躋武承明之廷當操券可得乃先生兩試禮部決然舍去歸而購草堂羅圖籍日夕寢饋杜門不復出蓋二十有餘年於

其歿也由經史迄說部論撰各數種編爲成書而精力所萃尤在古文四十卷、讀是文者可以見先生之所性矣先生之言曰古文之道根柢六經尙已然非旁涉乎子史及有資考證掌故之書以盡其變而博其趣則體不備非汎濫於古今名家之集合咀其精華而遺棄其糟粕則詞不粹而氣不充吾十齡外卽喜聚書旣屏舉業乃盡發藏篋而讀之於是秦漢以至近代流傳之本鮮不寓目絕去門戶之見各討其用意所在以折衷於六經其究也於漢取司馬氏於唐取韓氏柳氏於宋取歐陽蘇氏夫東坡之文雄六一之文曲柳州昌

黎之文古若敘事之作惟龍門一人足登左氏之堂後
此蓋難乎爲繼故使節取其長凡挾一冊以鳴世者其
間未嘗無一二心得發前人所未及苟條舉其得失雖
以歐柳大家弊且有不勝詰者則甚矣文之難言也祥
熊兒時過外家見先生臥起一室插架萬卷孜孜披誦
及長請業過從益數先生之勤劬猶昔也蓋歲三百六
十日先生無日不把卷非客至及有事未嘗離所處故
雖前後辛壬遭寇避地礮聲轟然而先生之著述不輟
其爲文不能限時日一字未安不輕出示人集中朱葉
兩孺人墓志爲先生病中絕筆而神明嚴飭如平時於

戲昔人謂文必窮而益工此偏論耳夫有所迫而始爲
與無所迫而爲之其用力安勉旣不同而爲時之蚤暮
不啻相倍蓰矣若先生者固無所謂窮而以本無求達
之心得并力以殫斯業則夫文之工拙又當何如哉祥
熊侍先生有年未能知先生什一承先生遺命以梓斯
集幸其成也謹述先生之緒論及平日所以窺先生者
綴言簡端爲世之讀是集者告焉煙嶼故郡中月湖十
景之一先生之樓當其地後居城外曰城西草堂以煙
嶼名集不忘舊也集爲先生自定手汰者什之三刻成
校勘之任嗣君壽及同門劉子鳳章實襄之祥熊未嘗

與其勞云

光緒三年歲次丁丑八月甥葛祥熊謹序

烟嶼樓文集目

卷一

序一

贈朱青石序

己亥

賀凌竹嶼受封典序

戊辰

尙書逸湯誓考序

癸亥

尙書逸湯誓考後序

甲子

春秋規萬序

庚午

四書精要錄序

甲寅

呂氏春秋雜記序

丙辰

呂氏春秋雜記後序

丁巳

新河周氏家乘序

己酉

四明它山朱氏譜序

丙寅

西河楊氏譜序

辛未

象山黃公隲史氏支譜序

甲寅

卷二

序二

先府君言行記序

甲寅

葛壯節公遺札序

庚申

重刊守身錄序

乙卯

二十里雲山館印存序

戊午

集荔子碑詩聯序

丁巳

新刻萬季野先生明樂府序

己巳

願學堂詩鈔序

庚申

刻寄愁草序

庚子

重刻遊杭合集序

戊辰

閏重三夜聯句詩序

辛丑

和天台三聖詩序

甲寅

燕喜集序

辛丑

卷三

壽序一

王筠叟先生八十序

戊申

范雨叔先生八十序

癸亥

陳餘山先生八十序

丙寅

張鐵峯先生八十序

己巳

徐曙峯七十序

戊辰

封振威將軍穀亭黃公六十雙壽序

辛未

陳子相六十序

甲子

卷四

壽序二

勵仙兩六十序

丙寅

周茹香六十序

辛未

徐丕績六十序

丁巳

陳魚門五十序

丙寅

葛小士五十序

癸亥

族兄蒔雨六十序

己未

陳一樓母陸太安人七十序

壬申

第四姊七十序

壬申

道衡葉公夫人袁恭人六十壽序

甲寅

卷五

書一

答馮柳東先生論民社書

與柳東先生論朱氏逸經考書

與柳東先生論夫子不爲衛君書

再與柳東先生論夫子不爲衛君書

與鄭耐生丈書

卷六

書二

與友人論喪中應試書

答友人問夏后氏藝文書

與朱述之司馬書

與董覺軒論碑誌不書生年書

乙丑

與及門劉藝蘭書

丙寅

卷七

傳

秦孝子傳

王孝子傳

周抑齋先生傳

陳西耕先生傳

辛丑

長者王東亭翁傳

朱青石傳

己未

姚梅伯傳

建隲唐四傳

丙辰

李縫人及買杖者傳

壬戌

卷八

婦女傳 志傳

趙節母袁孺人傳

李母鍾孺人傳

戴氏三節婦傳

己未

王稽雲母節孝范太孺人傳

丁巳

董子禾生母趙太淑人傳

甲子

范子眞少室殉節張貓姑傳

甲子

城中女子傳

城中婦人傳

乙丑

鄞志藝術鍾世俊傳

鄞志寓賢朱緒曾傳

鄞志列女董邱氏傳

鄞志列女朱呂氏傳

鄞志列女李徐氏傳

譜傳

許小雲譜傳

胡君引之譜傳

董君耿軒譜傳

甲子

何君荆山譜傳

甲子

朱蕙北譜傳

丙寅

宅山朱氏三君子合傳

丙寅

卷十

家傳

先考義行府君家傳

先妣李太宜人家傳

先伯兄醒墨先生家傳

戊辰

卷十一

四明志作者傳一

宋元四明六志作者傳序目

張侍郎傳

胡尙書傳

方校官羅錄參傳

袁劉汪王繆蔣伍樓余夏李傳

卷十二

四明志作者傳二

魏吉州傳

陳清毅傳

顏尙書傳

吳丞相傳

卷十三

四明志作者傳三

梅太府劉通判傳

劉忠肅傳

馮州判馬總管傳

袁文清傳

郭教諭吳教授徐訓導傳

王總管傳

王教諭傳

卷十四

事略 事狀 行狀

先義行府君事略 集虞恭公碑字 辛未

請旌表王順孫事狀 庚午

請旌表袁孝子事狀 庚午

請旌表沙孝子事狀 庚午

先妣陳太宜人行狀

卷十五

記

咸通塔記

壬寅

曹說資福寺鐘銘記

己酉

善長堂記

甲子

三友圖記

丁卯

醫俗軒記

戊辰

陳氏重得舊畫記

甲辰

崔氏世德記

丁酉

周氏世德記

辛未

五十七歲小像記

庚午

卷十六

記事

記費緯祉

辛酉

記周嘉瓚

甲辰

記湯丈

壬戌

記董秋史

戊辰

記武公

戊辰

記杭堇浦

戊辰

記無錫王氏婦 壬戌

記還簪 壬戌

記雷 壬戌

偷頭記 癸亥

卷十七

思舊記

思舊記序 丁酉

陸先生謹菴

包先生師竹

周丈薪岑

周丈雲巖

王丈漁山

宋丈培五

陸丈窠山

舅氏

唐君安嘉

從兄茗山

卷十八

碑文一

丁灣社碑 乙未

重修鄞大里黃公廟碑記 辛未

大雷汪王廟碑 甲辰

重建澤民廟碑 丁卯

四明宅山遺德廟從祀碑 己酉

廣德湖遺愛廟碑 丙辰

宋姑祠碑 癸丑

重修宋忠臣袁公祠堂碑記 代 癸丑

卷十九

碑文二

月波寺改祀余文敏公碑記 丙辰

明武德將軍驍騎尉甯波衛左所世襲正千戶

殉難韓君廟碑銘

癸丑

四明田舍陳氏祠堂碑銘

癸丑

橫溪王氏均和安三大房宗祠碑記

丙寅

鄞江義火祠碑

丙午

甬江吳氏義莊碑記

壬子

董氏鷺湖書院碑記

丙辰

卷二十

碑文三

徐氏先德碑銘

集表忠觀碑字

辛未

卷二十一

墓志一

布政司經歷贈資政大夫鄭君墓志銘

庚午

贈朝議大夫江君墓志銘

乙丑

貢生周君墓志銘

甲寅

封文林郎邵君墓志銘

丁巳

吳孝廉墓志銘

乙丑

城南袁君墓志銘

庚午

余尊泚墓志銘

辛酉

邵又橋墓志銘

丁巳

卷二十二

墓志二

徐遠香墓志銘

庚午

王警菴墓志銘

壬寅

封文林郎陳君權厝志

辛亥

鹽運司知事徐先生墓志

壬子

烈孝陳淑姑墓志銘

戊戌

貽贈孺人竺孺人墓志銘

丙辰

先妣陳太宜人權厝志

辛亥

亡妻朱葉兩孺人葬記

癸酉

小同瘞銘

甲辰

卷二十三

墓碑

武顯將軍福建海壇鎮總兵官鎮海倪公神道

碑銘

戊午

戶部郎中慈谿葛君墓碑

癸酉

故隴州知州李君墓碑

丙辰

上高縣知縣死事傅君墓碑

庚申

卷二十四

墓碣

壽昌縣學教諭殉節宋君墓碣銘 庚申

殉難庠生郭君墓碣銘 丁卯

徵舉孝廉方正鄭君墓碣 庚申

同年袁君墓碣 庚戌

卷二十五

墓表一

中憲大夫知金山縣署知丹徒華亭縣加同知

銜周君墓表 乙丑

文林郎前廣東大埔縣知縣任君墓表 丙辰

死事陳君墓表 戊辰

贈朝議大夫陳君墓表 乙丑

卷二十六

墓表二

贈文林郎山東臨淄縣知縣洪君墓表 戊辰

先師王綱齋先生墓表 庚子

蔣秀才墓版文 乙未

南山陳君墓門記

贈奉直大夫陳君墓門記 丙寅

卷二十七

考一

宅山遺德廟從祀考

廣德湖遺愛廟祀典考

卷二十八

考二

賀監里居考

卷二十九

考三

周氏譜源考

卷三十

論

夷齊讓國論上

夷齊讓國論中

夷齊讓國論下

象論

附說三則

丙寅

說象封在趙州

說零陵象祠之繇

說象廟之終不得毀

卷三十一

駁說

駁歐陽子縱囚論

駁崔三過失殺父議

康子饋藥說

庚午

清風說

鮪說

丁卯

羅漢松說

丁卯

卷三十二

題跋一

書葛壯節公年譜後

庚申

跋管天筆記

己巳

跋錢忠節公南征集殘本

戊辰

跋續甬上耆舊詩 戊戌

跋句餘土音稿本 庚子

跋四明仗錫山漢隸 戊辰

書劉忠公南豐諡議眞蹟後 庚午

跋王厚齋尙書九里廟碑 庚午

卷三十三

題跋二

跋明陳半湖先生墨蹟 戊辰

再跋 庚午

跋朱竹垞檢討墨蹟 甲子

題鄭寒村詩札

戊辰

又題寒村山樹圖

戊辰

題查宮詹臨米南宮書

丁卯

題王太僕書幅

丁卯

題羅兩峯畫達摩像

丁卯

題俞石年花卉小幅

丁卯

題奚鐵生松萱圖

己未

卷三十四

題跋三

跋熹平石經存字十六首

辛未

卷三十五

題跋四

跋舊搨虞恭公溫彥博碑十一首

原碑全文附
辛未

卷三十六

贊一

分類重編學海堂經解贊二十一首

并序
丁卯

宋元以來紀元表贊二首

戊辰

卷三十七

贊二 頌 銘

袁氏六世畫像贊

有跋

庚午

宋左朝奉大夫知處州容直袁公

宋左朝議大夫尙書倉部郎中子烈袁公

宋贈朝奉郎卿遠袁公

宋贈朝議大夫質甫袁公

先儒袁正獻公

宋贈少傅權兵部尙書袁正肅公

王厚齋先生畫像贊

丁卯

詠槐老人像贊

有序

庚午

陸東岑像贊

辛未

袁正獻公從祀

文廟頌

庚午

元貞二年琴銘

有序

乙丑

陸文虎先生竹笏銘

有序

丙辰

四弟子舟摺扇銘

丁巳

陳生鈞堂竹摺扇銘

甲子

白摺扇銘

有序

甲子

青蛻束紫雲硯銘

有序

丙辰

竹筆筒銘

甲子

卷三十八

賦

海甯塘賦

癸卯

太陽生日賦

薪溪歸隱圖賦

卷三十九

辭 祭文

翰林院編修同年周君哀辭

癸酉

周仲雲哀辭

有序

丙午

董孝子祠堂迎神辭

戊戌

除夜迎神辭三章

甲辰

祭賀監文

四明岳忠武王廟徐氏歲祭文

丙寅

重葬宋儒王桃源先生祭文

有序

癸卯

明倫堂公祭宋儒袁正獻公文

闕

祭太平府同知駐龍州殉難秋楂王公文

祭壽昌縣教諭殉節宋君文

有跋

戊午

祭朱蘭洲文

乙未

立兒子爲後告家廟文

癸丑

卷四十

四六

上羅宮詹師書

與友人書

重建漢孝子董君廟碑

代

先府君七十生日祝文

戊戌

先府君百歲生日祝文

戊辰

公請宋儒袁正獻公從祀

文廟呈詞

丁卯

烟嶼樓文集目錄

烟嶼樓文集卷一

鄞 徐時棟同叔稿 甥葛祥熊豫齋校刊

序一

贈朱青石序 己亥

青石任氣敢言交遊甚盛意以爲無足當者被酒則罵
座陵折人人望而去之勿願交青石青石以所爲駢體
詩賦示世人見者僵走譁謂青石才青石乃藉以出其
財帛攫取而揮霍之於是遨嬉都邑足踏豪門東西奔
走終年無坐煖時比來稍倦遊而青石之年則已四十
矣徐子曰嗟乎噫嘻我恨不能取青石而窮餓之耳夫

千里之馬非其主則幸於一飽不羈之士失其時則安
於小就我觀青石古所謂畸士者也充其志之所至可
以有爲充其敢言之心足以一發其胸中磊落不平之
氣乃始以罵座陵折人爲世所指惡一變而復以駢體
詩賦取鄉里譽望其才不一見而其志若將終身嗟乎
青石假令青石甚窮餓不得稍見於世青石將由閒道
疾趨博功名富貴以成就其意向區區者豈足道哉青
石之言曰我不願功名富貴但能長其年著等身書足
矣夫不功名富貴而著等身書天下誰信之嗟乎青石
我豈妄哉始青石乞余贈言諾而不果今年四月其弟

子醵金爲青石壽余實得其酒食因以狂言箴青石夫四十無聞斯不足畏今青石爲有聞耶爲無聞耶青石其勉之矣

賀凌竹嶼受封典序

戊辰

積而洩厚而久此天道之常而人事以爲憑焉者也吾鄉凌氏以忠厚積德世其家其始食貧自守其後儉勤得饒裕或覬覦之干之以非意輒遜然退謝不與校亦遂或得如其意以去里中父老每舉一二軼事相告語歎爲難能顧累世習舉業不能青一衿皆疑而怪之親家竹嶼君

誥贈朝議大夫榆鄉太翁之伯子而

貤贈奉直大夫芑洲太翁之所後子也溫默和厚一守

其高曾規矩讀書沈潛學既成試於有司復連不得志

久之以輸助軍餉獎敘藩佐而君意不少衰歲聘名師

所以督教其兩第一子者甚厚集郡中諸名士至其家

爲會課供食飲而已察視之一仿鑠院法無得有懷挾

傳遞延時日者既乃彙質名宿評定之若是者有年咸

豐五年乙卯仲弟韻士戶部舉於鄉越四年戊午季弟

子廉工部繼之明年己未戶部捷春闈其年而君之子

忠鎮捷秋闈又明年庚申工部試春官得雋越九年戊

辰爲

今上同治七年而忠鎮復成進士接跡兩叔父以主事
點用謁選得吏部冢宰視爲能使以文選司兼驗封司
於是得

贈封祖父如其官是

誥封君爲奉直大夫吏部主事加一級

誥封君配丁安人爲宜人十四年中兄弟叔姪相率取
科第名位如拾芥昔之難若彼今之易若此皆譁而榮
之而不知所以致此之固有自焉今夫環山之田隄其
闕以爲湖其始涸谷也雨降而潤之屢雨而瀦之非不

汪洋成漣漪而其由山罅隄隙而偶出者往往噴沫涓滴無奇觀至乎霖雨大作窮日夜不已羣山萬壑之水交集而齊下而於是風發駿怒浩浩乎決隄堰障蔽而狂奔而莫之能禦也夫世家之積德猶是也蓄之也淺則其泄之也短泄之也早則其發之也小然後知今者之易皆昔者難之報而昔者之難夫固若有故遏而鬱之以待夫今者之大其觀焉者也忠鎮吾壻也乃者乞假歸來省父母會戶部亦方以事還里門行當隨之供職京師月吉辰良將會宗族婚友而觴之而乞余一言爲二人壽余旣道其先世之畜德與君之能世其德以

爲君被

恩綸之所由致而更有進焉夫金羽之不敵夫人而知之然而積羽可以沈舟碰金至一葉則孩提得而毀之此無他厚則無不久與積之無不洩其理皆至常而天人感應之說猶後也今忠鎮承先之蔭受君之教以得繼諸父博取科第策名

朝廷政事教化之本民生風俗之原莫不習之於始仕而布之於將來以厚存心少成習慣異時敷歷中外蘊慈祥之德發之爲愷悌之政所以佐

皇仁者在是所以培祖澤者在是如水益深凌氏世德

將愈久而愈大由是揚名以顯其親當君恩受

寵命之日余又將以不腆之辭一爲君頌嫩之而今茲其濫觴也忠鎮勉乎哉

尙書逸湯誓考序

癸亥

逸湯誓考者所以考商書禱旱之誓之放佚者也昔者成湯正夏湯誓爰作於後禱旱史錄爲書同厥名篇是有一湯誓焉傳閱姬周篇各無恙內史過實舉後誓以告襄王吾夫子又稱述之以詔弟子其他墨翟尸佼之徒皆得見之戰國之季荀卿善著書而呂不韋以相父之尊招致豪傑而作春秋竝嘗奮筆援据其辭故凡周

秦古書若論語國語墨子荀子尸子呂覽其諸采引之
在禱旱篇者灼然明白未可混也秦政不道焚滅經術
帝王遺言蕩爲灰燼漢興濟南伏生憶所誦習口以傳
授而年過九十耄多昏忘伐桀之篇粲然禱旱之誓無
聞焉猶幸天不喪道斯文興起若前所稱諸書後先而
出雖商史舊冊終復湮微而奇章隻句賴不泯絕乃漢
儒不察炫惑同名但見湯誓概爲伐桀目睹大旱之語
而妄解元牡之文手注祠禱之書而謬指征討之作則
是是書也旣亡其全於秦人燬書之秋而又滅其佚於
漢儒注經之日也於是東晉妄人乘釁而動竄竊古書

之所徵引綴集塗點僭爲湯誥佞僞馳騁紅紫亂朱朝
野信之罔悟依託哀哉至於趙宋漸發其覆元明以來
交相掊擊洎我

皇朝瓌儒接踵是乃挾撓隱匿始有定讞然而蠱於漢

學阿好曲從一字之微無敢擬議墨稱禱旱孔云伐桀

謂孔君所注
論語堯曰篇

以周人難漢儒用經文誥傳義輒悟至顯

而爲漢者左袒故諸儒能知僞誥之剽逸誓曾莫知逸

誓之所由來譬彼汙吏旣伏其辜而敗露之賊未歸厥

主也嗟乎古昔聖王爲民請命憂勤惕厲反躬自責精

誠格上帝驩聲徧萬國史氏備紀其詳將爲後世遇變

常法而其書火於秦滅於漢竊於晉晦於今茲尙書之
厄於斯爲盛夫以先王恐懼修省之大經而坐令其隳
廢於

右文稽古之世此逸湯誓考之所以不能無作也是用
攬撫遺軼會粹舊聞發揮隱滯考定而疏證之敷暢鄙
愚時有論駁總若干言雖然鄙諺有之虜自賣裘而不
售士自譽辨而不信膚淺末學不經師匠辭理典據豈
云至當惟是經義蒙塞餘二千年千慮一得其敢自祕
孟子曰予豈好辯哉予不得已也輒復繕寫成書貢疑
有道儻博雅君子化其門戶準裁紛錯其必將有取於

吾言也同治二年九月鄞人徐時棟謹序

尙書逸湯誓考後序

甲子

余年二十好觀諸子嘗以墨稱湯說合符魯論同述告天之辭獨有大旱之語心竊異之研精覃思驗以他書豁然疑滯決爲禱旱是嘗著說一篇質之吾師馮雲伯先生先生奇余所作謬加稱賞謂斯實遺經之功臣而先儒之諍友也顧其爲說不過千言詞旣簡略義亦未備於後瀏覽羣籍念茲在茲凡可證明手自錄附書眉紙尾幾無閒隙雖人事奔走未遑整比然而畱意於斯學者則旣三十年矣客歲之秋始撫羣言次第先後辨

論而考定之分爲上下其年冬仲遭罹鬱攸會余方客
慈溪倉皇顛沛中壽兒愁置儲侍輦余著作暴客麇集
攬奪以去拋散泥塗或擲諸河重拾棄餘檢視殘脞則
鄙著詩文什存五六說經諸作靡有孑遺而逸誓之考
不可問矣夫經義宏深累世莫究前儒訓詁悉有淵源
而欲以禱昧後進哆其辯辭妄思易幟攻勝往哲斯已
難矣草稿甫就旋爲灰燼清夜自省良用警懼雖然墨
書布在詞非奧祕明明禱旱萬難曲解而違反文義引
其書而故歧其說此愚所未解者一也唐宋諸儒誤信
僞誥又墨書微晦獲見不易至乎僞覆旣發墨書盛行

而視若無睹置之不論甚或私意發難誣以增改此愚
所未解者二也墨者所援實爲聖經諸儒據依盡出傳
注夫紛競之論宜尊儒以闢墨考据之學豈容舍經而
從傳乎此愚所未解者三也墨之爲道也是古非今訾
賢毀聖至其稱說儒書豈敢僞造經語倒其戈戟反授
人柄何況呂覽不謀同辭爲之證佐而乃盡廢周秦阿
附漢晉此愚所未解者四也魯鈍固執其惑益甚欲達
所疑復理前說顧卷帙旣空半出彊記或憶其略而失
其詳或識其義而忘其語故復入城借畱時下陳榻謂
門中翰樹珊客散主寢檢其插架手錄以歸始屬稟以

駕部雨家

今夏五月下旬積四十餘日克有就緒粗可覽觀回念
前著大略不異若其援引不能備也往者爲書二卷萬
數千言今茲所成數幾倍之馬齒日長而學無寸進典
據加少而議論滋多譽辯不信所由誦前言而生忤也
而又歷序所遭并言其意惟庶幾正德君子矜我劬瘁
閱其改作斷削紕繆參酌是非所謂擁篲清道企望高
躅者意在斯乎意在斯乎同治三年歲在甲子七月既
望謹序

春秋規萬序

庚午

吾鄉萬充宗先生著經學五書其中學春秋隨筆始隱

公迄昭公凡十卷前年余嘗取而讀之有暢然意滿者

有於鄙意未合者輒以己見筆之書眉若乃經書元年

謂諸侯之僭隱元書夫人孫齊不稱姜氏謂絕其族屬莊元

書納子糾謂予以嗣君之稱而糾遂爲兄莊九書夫人氏

無姜字謂別於生稱僖元書晉侯伐鄭謂州蒲之父成十書

暨齊平謂魯與齊平昭七以至論桓公不書王桓三論莊公

與齊盟莊十與其納幣莊十三論仲孫來魯閔元論叔武盟

踐土僖二論左氏記趙盾宣二與立武宮成六論袁克葬故

主昭八論意如出君昭十五則皆私心大以爲不然者闕外

行旁駁詰幾徧是時及門劉藝蘭方主我家塾謂實有

發前人所未發者不第爲萬氏諍友而已當別錄爲書
以示學者忽忽三四年亦旣忘之今秋曝書重見評本
周視一過略有增益而黠乙旣多或難循覽因授意壽
兒命之鈔錄壽乃錄稿付書人釐爲三卷繕寫旣畢請
余命名竊取劉氏規杜之義名之曰春秋規萬嗟乎充
宗先生嘗兩纂春秋傳所見傳說數十百家擷精掇華
斷以己見以爲是十卷之書此其浸漬之深若染羽者
之七入而繡也其簸蹂之精若舂米者之七升而侍御
也而後生小子乃欲從而益之墨而去其粃焉抑何不
自量耶昔劉氏之規杜也豈不謂勝杜萬萬哉乃杜解

傳之後世立之學官而劉規無傳書孔氏疏杜解或引

劉說後人始得見劉書崖略而因之以爲持平

前余嘗蓄此書

今并忘作者姓名記是邵姓

然則杜解固不因劉規而損而劉說乃

轉藉杜書以存也今余名余書以規萬他日有讀萬氏

隨筆者亦或參引吾說而質正之則余書未必不因之

而傳此余所以名規萬之私意而豈信能規之也乎藝

蘭方在杭州而吾老友陳君子相善觀書精於抉擇往

吾妄有所著必君爲我論定之今將以繕本示君故縷

述其著書之繇與名書之意於卷端君盍亦不厭詳盡

以規我乎藝蘭歸來當共與快讀之也同治九年八月

十二夜子初時棟書

四書精要錄序

甲寅

世之詆時文者謂其道盛而經亡余謂時文不足以亡經也經之亡時文之衰也擘裂而咀嚼之媿比而塗澤之陳言爛語異喙同音稍或以疑義相質難目瞪舌撟而不能語則宜乎擘經之士之深惡而痛絕之也溪上袁梧山孝廉作四書精要錄亦爲時文之道者也吾外舅葉觀察與有連刻其遺書而謂余序之余觀其錄中論語上下篇如謂逸民之逸非隱逸聖賢之別在宮不在牆爲同姓之爲非平聲乃昭公自掩其過子貢之論

紂非爲紂恕夫子之論孟莊不改父政非三年無改意
皆於常解外別自有會心足使學人共參之又謂危行
言孫爲士之持身處世者言而非謂立朝者苟立朝有
道無道如矢而已如之何其遠害也此則深有裨於世
道人心之論而不徒善於解經已也夫經義至無窮也
數千年之久億萬人之眾竭其心力而未必其盡蘊也
譬裂媼比者無論已卽訓故之家能悉通之而無遺憾
乎知一而昧二得此而失彼以余所見蓋四書中名物
事理幾有自漢唐來未之能發者博聞約取以求當乎
經旨然則是錄也雖學經之士將不能無一二採也而

況爲時文之道者乎

呂氏春秋雜記序

丙辰

周秦之際儒墨分途異端橫起其家自爲學人自爲書者何可殫數暴秦吹燄衆說銷鑠然而存於今者六經孔曾思孟之道昭昭乎日月矣其他逸周書穆天子傳之餘於書大戴之餘於禮國語國策竹書紀年之餘於春秋三朝記之餘於論語弟子職之餘於孝經晏嬰荀況之儒粥熊管夷吾老聃辛文關尹喜鬼谷莊周列禦寇鶡冠子之道商鞅韓非之法尹文子之名墨翟之墨太公孫子司馬法之兵書屈原宋玉之詩賦山海經之

數術黃帝扁鵲之方技無論僞作也卽前儒指稱爲古
本者亦旣皓首而不能徧讀況在秦以前哉於時呂不
韋以相父之尊耦國之富招致天下豪桀士羅古今圖
書刺取衆說采精錄異勒成巨編僭其名曰春秋專其
號曰呂氏劉略班志品目之以爲雜家蓋精確乎不可
易矣其書瑰璋宏博幽怪奇豔上下鉅細事理名物之
故粲然皆具讀之如身入寶藏貪者旣得恣所欲以去
廉介之士雖一毫無取而不能不歎羨其備物之富有
也乃儒者獨以不韋之書而羞稱之嗚呼此豈陽翟大
賈與奔走於其門下者之所能爲哉夫蠶之毒也而蜜

人食之衣工之賤也而裘人衣之蜜成於蠶也蠶采之於百華裘成於工也工集之於千狐惡蠶而傾其蜜賤工而裂其服則豈不悖矣呂氏之書呂氏爲之抑豈呂氏之爲哉遺文軼事名言至理往往而在攷其徵引神農之教黃帝之誨堯之戒舜之詩后稷之書伊尹之說夏之鼎商周之箴三代以來禮樂刑政以至春秋戰國之法令易書詩禮孝經周公孔子曾子子貢子思之言以及夫關列老莊文子子華子季子李子魏公子牟惠施慎到甯越陳駢孫臏墨翟公孫龍之書上志故記歌誦謠諺其攢摭也博故其言也雜然而其說多醇而少

疵嗚呼此豈賈人子與其食客之所能爲者哉漢人高誘有言尋繹此書大出諸子之右吾習其書尤信故於諸子中每好觀是書竊嘗總攬大略以論之如此高氏訓解稱善本自宋以來刊刻多謬譌至於我

聖朝有畢沅氏校刻者最爲精審循環誦繹覺高注畢校或牴牾本義失其旨趣私輒病之閒以鄙意筆諸眉端積久愈多別錄成冊爲呂氏春秋雜記千慮一得或未必無補於讀是書之君子若謂斲而裁之則吾豈敢咸豐六年十二月甲午序

呂氏春秋雜記後序 丁巳

余既爲呂氏春秋雜記記鄉先生黃東發氏嘗校是書
取視之但記每篇大意時或掇采其語而論衡者寡因
摘其所論與吾言異同者附見一二又記近人梁氏玉
繩嘗作呂子校補復取視之則詮釋駁辯所證據之書
與吾言合者十有八條愛士篇處廣門之官順民篇湯
旱五年孟冬紀物勒工名至忠
篇文摯治病長見篇觀存本味篇伊尹說長攻篇服衰
登山慎人篇共伯精諭篇篇好靖不屈篇煙視高義篇賓
萌知分篇夏后啟召類篇篇司馬子罕過理篇帶益三副
原亂篇無過亂門博志篇夢文王周公上農篇后稷曰
共十七條又庭立紀聞探諸以或纖悉盡符或大略不
敦說貴信篇篇抽劒自承一條
異豈惟不如其先得抑亦足以驗吾言之或庶幾無大
謬也各存其說更不刪雍而其餘條由鄙意以爲乖背

者亦或辨折之未能盡也凡雜記爲卷八爲條二百二十七爲文三萬三千有奇旣而以示陳君子相或有所商榷取其說附之卷中又偶以記中語語宋君蓮叔亦嘗參數語又附之久之某君宿草堂讀是記半夜而盡旣歸書來辯難所駁詰者四事滔滔九百五十餘言又久之余始答其辯四倍於原書今具以兩書附記末爲四千八百餘言於是擘卷著錄冠初脫橐時并言於首復記成書以後所聞見者爲此序合爲序目復二千言總凡十卷幾四萬言付之削氏就正有道吾嘗謂自得之聰明每苦於不足求勝之意氣常處於有餘以有餘

之意氣而睥睨攘臂踴躍然爲不足之聰明爭勝負此水火之所以日甚而門戶之所以日闢也博其識以淵源乎周秦之書平其心以酌量乎漢宋之學博則會會則通平則公公則明由斯道也雖治經無難而況諸子然而知之非艱行之惟艱蓋未嘗不景仰先哲而撫卷以忤也咸豐七年九月望後三日書

新河周氏家乘序

己酉

周君楚堂修其家乘以草稿來相質問周君厚重謹慎凡三易稿而三質諸余塗乙是正歷八年始克成書旣成而序之曰譜牒之書君子之所以收族也夫人心日

媿坐漠視其宗者於側而身教而口喻之不必其悔且
悟而譜牒之書君子以之收族何哉夫天下之漠視其
宗者非必其性使然將必未嘗有感之者也昔有兄弟
訟者官不問而縛諸庭令曰兄呼弟弟呼兄無得絕聲
不者笞汝其始閉目而強呼其繼面相視呼之既久皆
大哭求罷訟夫譜猶是也有人於此方惑乎讒閒而忿
其宗乃試啟篋而觀譜焉不覺慨然歎曰某與我同祖
某與我同宗以其漠視之人而聯之同枝是乃所以責
其交相呼而感發其至性者也故吾嘗謂家無大小必
當陳譜於室子幼父教之弟幼兒詔之椎魯而無文則

士夫及商賈之知書者告之出門而道遇焉曰此向者譜中之所謂某焉者也入廟而會食焉曰此向者譜中之所謂某焉者也歸而求諸書而其名儼然與我同籍焉孝弟之心不由此生乎道路之人與同逆旅雖一日之暫而疏者以親況乃同宗祖之子孫聯之同籍取而觀之而猶漠然此豈人心也哉故曰譜牒之書君子之所以收族也世之爲譜者或以名位誣其先代或乞鉅公文字炫耀里俗其亦去作譜之意甚遠也吾與周君皆無取乎此也

四明它山朱氏譜序

丙寅

四明朱氏爲它山望族其先蓋婺源人南宋初諱伯劭者官明州節推有惠政卒而其子子良葬之它山廬墓講學是爲文淵先生民德節推額祀之曰新安廟而號文淵家塾曰新安館其子孫聚族居此至於今且八百年其譜始作於明永樂中易世屢修入

皇朝又更修之七修於道光甲午雲巖君聘張丈鐵峰主其事時余方讀書它山獲觀其成雲巖君者吾外舅錦齋君之季弟也又久之其從子絳山有憲家牒時諏訪宗親疏記瑣屑未得成書絳山隕命今年春雲巖君孫行志桐等始約其宗人拙整舊槩依仿前例續爲茲

譜意所未合亦稍更變厯月若日繕冊以付手民謂余
朱氏壻也備悉其家世請一言弁首簡於是距七修之
歲三十有三稔矣夫譜者所以承先而啟後者也夫承
先啟後之云則久爲陳言矣然而天下之至言未有不
本於天下之陳言者也它山水利漑鄞七鄉朱之先屢
有功胡制使寶慶四明志魏吉州它山水利備覽可考
也文淵以循吏之子爲里大師鄉之人感之至以故籍
名其館與其所居之橋若是乎德之入人深也傳閱數
十世喬水無恙自余壻朱氏親見其老輩成梁浚河修
舉黨政及余與數君子整治塘堰諸兄弟又交贊余而

曩時貞吾書塾之甥以教宗族子弟與其義田之立以
惠貧困者則固已追本文淵之淑其鄉者而推廣之嗚
呼其不謂之善承而善啟者耶夫今昔之事莫不於譜
焉詳之爲之裔者將徒爲是觀美以揚詡其先德於黨
中人乎抑亦懼續德之不易而繩其武而圖履之乎朱
氏固大族其子姓率敦厚端謹服疇食德久久弗替遠
之則新安之遺緒也近之則貞吾之家教也觀感興起
夫不將有大其宗而以其族爲四明之望者乎不然而
曰吾識名字而已別族屬而已又曰吾知先人之美而
已是則非今茲所以修譜之心而亦非吾姻婭所以序

茲譜之意也

西河楊氏譜序 辛未

西河楊氏四明諸楊之微者也相傳當宋南渡時由江南來居鄞城西河營歲月浸久失其系本至明有所謂質庵公者乃始著名字可考見代世縣延入

國朝到今又二百年於是由質庵以下得十四世或遷徙客寓他郡縣在鄞者僅僅數十家世德勿耀無顯赫名位著聞縣中可謂微矣然而士商工賈安居而樂業無莠民梗子敗壞家教其賈而賢者若秉圭若伯音皆能追念本源孳孳以譜牒爲念今之宗譜秉圭剗之伯

音踵爲之伯音卒而秉圭實成之者也今夫豪宗強族
非天生而位置之也奮發在子孫而積累必自其宗祖
卽以四明諸楊論之鄞楊莫盛於明之西楊文懿兄弟
鼎然負天下重望其後簪組蟬聯遂爲吾鄞四姓之冠
而吾誦野叟贈詩則文懿大父不過一村塾師耳白髮
窮年呻吟里巷庸詎知越世而遂有名臣大儒踵接而
起耶然則素位而行守吾先以待吾後人而已微宗奚
憾耶譜成介吾友小苑來請序小苑其族兄也譜事蓋
與有功焉抑賣支事人古今同慨四明諸楊之焜耀於
宋明兩朝者同此郡縣攀附非難而譜中不牽連一語

是其識不尤高出庸眾人倍蓰耶

象山黃公隲史氏支譜序

甲寅

鄞史氏當南宋稱強宗而旁支在象山者獨以隱德傳至今六百有餘年蓋八行先生六世孫鏗孫以咸淳閒遷象山縣南六十里關頭保生五子世其居第三子文叟君在元至元閒又益遷而南去關頭五里曰黃公隲居焉其地負山而面海其風俗質樸而敦厚其子孫耕而讀以世其家其士常無志於仕宦代有名諸生距所居而近有田洋湖史之人田其中縣之諺曰種田須學田洋史蓋其耕者善力穡又如此嗟乎貴戚之門爭趨

若鷺凡趯趯而卻顧者皆日夜謀夤附而不得其緣者也當史氏盛時三宰相五執政侍從卿監與中外列要津者未易悉數關頭而上五世與諸宰執皆期昆弟旁近房從之親稍降心焉宜無不手援之者而吾考其家牒三世無官二世則末秩而已至於關頭乃遂遠去其宗袞之鄉子身海島至於其子又益去而遠焉六百年來傳二十世聚族數十家猶令人想望其高風明州宋大郡也而象山則僻陋之小邑也宋地志狀其縣風俗曰士夫安於恬退庸庶勤於耕墾吾觀諸史氏尤信黃公隩舊無譜附於關頭往年踵爲之者詮次失序於

是文叟君十四世孫松亭錫周及松亭之子錦標刵爲
支譜數君子者皆庠序之選也其爲譜簡而不略詳而
不蔓有古法焉錦標嘗從余遊至是航海來鄞請余言
弁卷端故爲追美其先德而勸其後人且以著斯譜之
刵始云

烟嶼樓文集卷一

男隆壽平甫校字